

## **ASO FARAILE, 19 FEPUARI 2021**

*Na nofoia e le Sui Fofoga Fetalai le Nofoa i le itula e 9:27 i le taeao e tusa ai ma le Tulafono Tumau 27(1).*

Tatalo.

**SUI FOFOGA FETALAI:** Ou te faasilasila atu ua toe amatalia nei Taulumaga a le Fono Aoaofa Fautulafono.

E ia te au foi le ava ma le faaaloalo e faatalofa ma faafeiloai i le paia maua o le Maota, i le afio mai o lau Afioga i le Taitai o le Malo, lau Afioga i le Palemia ma le Aiga Kapeneta. Malo foi le folau malo le soifua.

E faapea foi a outou Afioga i Minisita Lagolago, Taitaifono o Komiti Tumau a le Maota, sui usufono mamalu uma o le Palemene, ia, e ofo alofa ma faatalofa. Malo le soifua, malo foi le onosai.

E faapea foi ona faafeiloai i le faafofoga mai a le atunuu i lau silasila mai i le Fonotaga a lau Palemene, ia, matou ofo alofa ma faatalofa atu.

Le paia o le afaigaluega totofi o faanonomanu aua se manuia o Samoa, malo galulue, malo faatoatoa i le feau ma le galuega. Ia, tapuai maia, o lea o le a alo lau Palemene e tusa o feau ma galuega ua valaauina ai i lenei taeao.

## **TUUIINA ATU O PEPA**

*Na tolaulauina e le Failautusi le faasologa o le Tuuina atu o Pepa e tusa ai ma Tulafono Tumau 49(2).*

1. S.R.2021/2, Tulafono o Teuteuga o le Faavae 2020 – Faasilasilaga o le Amata Faamamaluina.
2. P.P.2020/2021 Nu.137, Lipoti Faaletausaga a le Matagaluega o Tupe 2019/2020.

## **TULAFONO TAU FAAOFI O LE FAATATAUINA O TUPE FAAOPOOPO (NU.1) 2020/2021 – felafolafoaiga faaaauu i luga o le faitauga faalua – Aso 23**

**SUI FOFOGA FETALAI:** Ia, e tolopo Galuega a le Fono Aoaofa i le aso ananafi, ua maea ona saunoa manino le Afioga i le Palemia i lana folasaga.

O lea ua tofi foi le tamua aua le Aiga Kapeneta. Ia, ma ou te fiafia e tapa lau Afioga i le Minisita o le Matagaluega o Tina ma Tamaitai, Atinae o Nuu ma Afioga ma Agafesootai e te saunoa i lau lauga, ma talifuaitea e tusa o mataupu na laga e sui usufono o le Palemene.

**Afioga Hon TUITAMA TALALELEI TUITAMA (Minisita mo Tina ma Tamaitai, Atinae o Nuu ma Afioga ma Agafesootai):** Lau Afioga i le Fofoga Fetalai, faafetai mo le talosaga molia, lea ua e le manu ua logo le vateatea, ua tu mai lagi le lagaali a Tamafaiga. O lo outou soifua ma so matou ola, e puleesea. Ae a le aso? A lea ua tu le vaga i le figota ua olioli livaliva. Ua le o mala a o manu alaga. Ua tatou sapi ai nei i lagitau ma tatou siva i maa o malie. Ia o le Atua pea o lo o i ai le viiga, le faamanu ma le faaneetaga e faavavau, faavavau lava.

Lau Afioga i le Fofoga Fetalai, faafetai mo le avanoa e tali atu ai i mataupu sa laga e sui usufono mamalu i a latou saunoaga i le Tala Faatata Faaopoopo o le Tupe. Ma e talu ai foi o le aso o le aso puupuu, e i ai le lagona, o le a leai se faauilavea i lenei aso. Sa seu le aliiseu ma lona soaseu i gauta o Aana, ona faapea atu lea o le aliiseu i lona soaseu, “Alu atu ia se i e tu ma vaai i Sasae, po o le a se mea e te iloa atu.” Ua alu le soaseu ua tu ma vaai, ua foi mai ma le tala ua faapea mai, “ua ou vaai si ao laitiiti uliuli o lo o tu mai Sasae.” Ona faapea lea o le aliiseu, “O le fuifui lena o lo o aau mai le vasa, ae alu i na toe vaai.” Ua alu le soaseu ua tu ma toe vaai ua foi mai ma le tala fai mai, “Ua atuumauga le fuifui.” Ona faapea lea o le aliiseu, “O lupe na sa vaeseese a o lenei ua fuifui faatasi.”

Ua paia ma mamalu le mea nei, ua liligo le fogatia, ua pau le tuaau ma fuamalu o le Tuiatua. Ua tulili le tai ua taaligoligoa foi le gataifale, aua ua matalupe le seuga, ua matai’asa le tiuga. Ua mati’e tiasa, ua pue foi le galu fuliafa. A lea ua atoa le taeao, taeao usu o Fuluulalematoto, ua papae le fogatao a ua taoto ti’a i paga, ua mamalu ma maualuga le paega o tiasa i ulupagā, aua o lele ua epa ma papaaao sui usufono mamalu o le Palemene, o lupe na faia mai i le fuifui.

Afio lau Afioga i le Fofoga Fetalai, afio lau Afioga i le Palemia o le Malo Tutoatasi o Samoa, o le Taitai foi o le Maota, lau Afioga Tuilaepa, Auelua Fatialofa Neioti Aiono Galumalemana Dr. Sailele Malielegaoi. Afifio Afioga i Minisita o le Kapeneta, Minisita Lagolago ma sui usufono mamalu uma o le Palemene o lo o tauaofia nei.

E le laaloa sa matou faamatalaga, ona o lea tatou te faatasi ma poututoa o Matagaluega ma Faalapotopotoga a le Malo o lo o tua i ai le Mal oi ana fuafuaga ma polokalame mo le atinaeina o le tatou atunuu. Afifio ia ma papaaao a outou Afioga i Taiulu ma Ofisa Sili o Pulega o Matagaluega ma Faalapotopotoga a lo tatou Malo.

Ae ou te le i laasia le pa i fualaga, tau ia ina ou faapai atu ma le agaga faaaloalo i le afio o lau Afioga i le Failautusi Aoao o le Fono Faitulafono

faapea tupu ma tamalii o le atunuu, saoa ma tamaitai o lo o tautuaina le Fono Aoa Fautulafono a Samoa.

E le faagaloina foi le tapuaiga a le tatou Tafatolu Fefaatauagai a lo tatou Faigamalo, i le afio o le Faamasino Sili, le Peresetene o le Faamasinoga o Fanua ma Suafa, afioga i Faamasino ma le mamalu o le Faamasinoga.

E le galo Afia i si ona vao i le faafofoga tapuai mai o lau Afioga i Le Ao Mamalu o le tatou Malo, lau Afioga Tuimalealiifano Sualauvi ma lau Masiofo, lau Afioga i le Sui o le Fono a Sui Tofia, lau Afioga Le Mamea Ropati Mualia ma lou faletua.

Afifio foi le paia maualuga o Samoa, le paia i Aiga, o Aiga o Tupu, Aiga o Ee, Aiga o Papa ma Aiga na Tafaifa. O Aiga ma latou Tama, o Tama ma Aiga, Tumua ma Pule, Ituaui ma Alataua, Aiga i le Tai ma le Vaa o Fonoti.